

請觀音經疏闡義鈔卷第四

法五

宋 錢唐沙門 釋 智圓述

○涅槃云不住法相及衆生相名無緣慈不
住二邊即不噉義衆生緣法緣者涅槃云慈
之所緣一切衆生如緣父母妻子親屬名生
法五
緣不見父母等見一切法皆從緣生名法緣
是則生緣雖不噉空而噉有法緣雖不噉有
而噉空故云皆有分齊無緣無分齊者不著
二邊故灰能去垢灰如五觀垢如貪等貪等
除時名澡浴清淨說文云澡洗手也浴洗身

也五辛苦辣者慈閻三藏云葱蒜薤薑興渠
五也興渠者應法師云梵音訛也應云興宜
慈閻云根形如蘿蔔出土辛臭慈閻冬到彼
土不見其苗此五物辛而復葷故經云五辛
能葷有辛而不葷者如薑芥之屬則非所制
蒼頡篇云葷辛菜也九物辛臭者皆曰葷決
定經云若人食酒肉五辛入伽藍墮豬胎中
後得人身常患腋氣故今誦呪之人不得食
也今約理解乃以辣味逼迫於舌如五陰之
苦也葷氣經宿猶存如五陰中所起惑業能

至未來故云有集諦也汙穢等者指上所表是約見愛汙穢陰也九種五陰如前記經女人汙穢者大論云姪欲雖不惱害衆生以心繫縛故既求解脫故須制之經長與苦別者似位別分段苦真位別變易苦此別圓也亦應約十種行人通證於前者觀音說兩呪既畢故通印證之釋迦因是自說第三呪也經來燒此女人者即鬼動其姪也阿含云姪亦有鬼鬼入心則使姪佚無度或鬼使瞋使邪燒乃了切說文云擾戲也郭璞云燒弄也

經入善境界者約十人中餘九皆名善境界也乃至唯佛名善經惡鬼消伏者觀音有威有恩若非懷恩則是畏威所以消滅調伏也經三障永盡者二種三障也一分段三障見思爲煩惱障惑業爲業障界內生爲報障二變易三障又二一方便三障塵沙爲煩惱障無漏業爲業障變易生死爲報障二實報三障無明惑爲煩惱障非漏非無漏業爲業障彼土變易爲報障此呪能令至於究竟寂光故云三障永盡也三界獄火者三界繫閉行

法五

人猶如牢獄無常如火衆苦者分段三界有五八之苦變易三界有塵沙無明之苦四百四病者一大不調百一病起四大合四百四病也界外應以障四德爲病入陣鬪戰者若約理者與五陰魔煩惱魔死魔共戰也經如鷙隼飛者易曰王用射提亦隼于高墉之上孔穎達云隼者貪殘之鳥鷗鵝之屬今明觀音垂應如彼鳥飛言其速疾也經囹圄者音鈴語廣雅云夏曰臺殷曰羑音酉里紂拘文王是也周曰囹圄皆獄之別名周禮云三王始

有獄釋名云囹領也圖禦也謂領錄囚徒禁禦之也經及諸刑罰者即五刑五罰也王制曰刑者例也例成也一成而不可改也說文云罪之大者曰刑罪之小者曰罰廣雅云罰折伏也尚書甫刑云五刑不簡正于五罰孔安國注云不簡核謂不應五刑當正五罰五刑謂刻其額而涅之曰墨刑截鼻曰劓刑刖足曰剕刑男去勢婦人幽閉曰宮刑死刑曰大辟於今即笞杖徒流死爲五刑也五罰者出金贖罪也書云墨辟疑赦其罰百鋟等於

今則笞杖徒各有五等流有三等死刑二等贖銅各有斤數經一日等者明受苦惱之時分也第三呪

多經吶 安陀誓 般茶誓 枳由誓 檀
陀誓 罷陀誓體式底邪婆陀 耶賒婆陀

頗羅臘紙 毘質雌 難多誓 婆伽誓
阿盧柂之切引薄鳩誓 模鳩隸 尤毘隸

娑訶

凡五十字

歎功用文爲三者前一是應能拔苦後二是機能修行又前一是果上化他後二是因中

自行又六道是所觀之境六妙是能觀之觀六根是所破之惑故此三段經文不出機應自他及機應各論境觀惑三也稱三寶名是六字章句者謂佛陀達摩僧伽一寶二字也三寶爲三字者卽單云佛法僧也若以此六字者卽指前二家處處皆有者前一番呪皆稱三寶應皆名六字章句也起盡之文者起即標章盡謂結句六妙者此六次第相通能至真妙涅槃故云六妙門也於義爲便者二十五有及以六道但總別之殊大經既以二

十五三昧破二十五有則與今經六字章句
對破六道其義相符故云爲便也所以明此
二種章句者謂三種雖殊不離破有也前一
是化他破有後二是自行破有於自行中前
一是破有觀後一是有中惑即六道中各具
法五
六根六根皆起三毒也是知三種六字不出
大經破有之義也六出者三處各出標章結
句也說偈竟者偈應作呪字之誤也後結句
云等者即經云告阿難言是六字章句乃至
若有聞者獲大善利六道是六字門者文剝

門字無量種者如人道貴賤愚智妍蚩一一
不同人道既然餘皆倣此即是章段句逗義
也又照六道實相者謂照六道三障即三德
也此約自行釋遮持義破三障即遮達三德
即持故云得陀羅尼等也有我不耶者彼經
迦葉問也答云即佛答也我即佛性者即直
我也窮此理性者研窮三諦生佛無差菩薩
分顯諸佛究竟而能理事互融普門示現故
云而得自在故能下約化他釋遮持也以自
證故乃能化他亦由自他體性互徧天道苦

少者謂非全無苦但少於諸趣爾知欲天有五衰之苦四禪有不得速入禪苦四空有四心之苦八難謂三惡道爲三四北洲五長壽天六佛前佛後七世智辯聰八龍首瘞啞一切之言等者既云一切何所不攝尚離二種生死之苦況天趣耶經果蓏說文云亦上曰果地上曰蓏應劭云木實曰果草實曰蓏張晏云有核曰果無核曰蓏經亡失下示惱對相經接還本土者失妻子喪財產由亡國故今得接還則餘事自得經鳩槃茶此云壅或

云冬瓜其陰似甕等故即厭魅鬼也經巍巍者高大之稱論語云巍巍乎舜禹之有天下也經阿脩羅者阿之言無脩羅云天彼非天故又脩羅云端正彼無端正故從今世等者據經分齊從阿難當知已去今的指得失之文故云從今世等失謂失惡是遮義得謂得善是持義如無生忍者大品云無生法即是佛此與陀羅尼義同也然亦通因似初境界者似六根淨位旋假入空耳未敢定判故云似也經吉祥句即陀羅尼近世經本於手出

香色乳下剝有飢渴逼切者一句古本皆無
智者於諸文引用亦無此句經善集慧即一
切種智也經如救頭然者金光明云譬如男
女如火燒頭如火燒衣救令速滅火若未滅
不得暫安懺悔亦爾此則然字是燒然也又
大論明野干救頭之喻名救頭然則然字是
語辭也經寒林者即尸陀林僧祇律云此林
多死屍人入如寒可畏也修頭陀行者多居
此林以易觀無常故斯那即其人乎經無央
數者梵云阿僧祇此云無央數楚辭云時猶

未央王逸曰央盡也觀心下廣釋心脈於中
先約肉團心爲因緣之境次觀慮知心以成
三觀赤肉之心即肉團心也正法念經中如
蓮華晝開夜合即此心藏也俗書謂之方寸
以此心藏唯方一寸故然爲慮知之所託附
故肉團有病則慮知顛倒也一身之主者提
謂經云心爲大王上義下仁故居百重之內
故一身六分悉由於心也通明觀者謂從初
法五修習通觀息色心三微見無礙故名通明又
善修此禪能發六通三明因中說果故名通

明此禪無別位次還約根本四禪四空而修耳今經觀心心脈即此禪也委明修證如禪門第八卷若空下此約慮知之心以成空觀於中先立境次心無下明觀一切世間即十界各三種世間也無不從心造者十界是所造心爲能造全所是能故觀能造即具諸法種種五陰者亦約十界也此皆華嚴文心無下正明空觀十界依正既並由心故觀心空則諸法空如伐樹得根則枝條自死也言心無心不有心空皆一義耳乃至無量諸脈者

即十界各各心脈不同也心脈下覽前空假同歸心性三一圓融故皆不定不空不假者一念叵得故不假百界宛然故不空是故空假不離心性諸脈亦不空不假者諸脈皆由心造故諸脈皆即是心故所以心即中故諸脈亦中即是圓觀心脈者總結前文俱成圓脈亦中法王觀行人下云云者以事解歷受苦報及修人天善法者以空觀歷二乘以假觀歷三教菩薩三觀融即本在圓人深不遺淺義可通若冇能觀等者即釋觀心心脈句也能觀即

觀字所觀即心心脈也既云一處一即空也世即三種音是機緣故屬假也不爲二邊所縛故名解脫是中觀義而又云下此釋伏難也應難云若此經文對三觀者何故結云成阿羅漢耶故今釋云此約十人前二得道成小乘羅漢乃至成大乘圓頓之羅漢如法華云我等今者真阿羅漢普於其中應受供養則圓人亦名羅漢明矣故云無咎廣明經文應分爲二初從云何下明方便二從安庠去明修證禪法即次第禪門也云云者謂具五

緣訶五欲棄五蓋調五事行五法故有二十種也故禪門云方便者善巧修學之異名行者於初緣中善巧修習故名方便事理兩解者如止觀約觀心釋方便即理解禪門中但有事解調五事者謂調食令不飢不飽調眠令不節不恣調身令不寬不急調息令不澀不滑調心令不沈不浮然此五事食眠則定外各調後三則定內合調今經於五事中但示合調三方便者從要而說行者必須備二十五法具如禪門始於三事等者正明今

經從要之意大集經云歌羅邏時即有三事
一命二煖三識出入息者名爲壽命不臭不
爛名之爲煖即是業持火大故地水等色不
臭爛也此中心意名之爲識即是剎那覺知
心也三法和合從生至長無增無減愚夫不
了於中妄計我人衆生作諸業行心生染著
生五顛倒因緣往來三界名迷若尋其原本不出
此之三法名解修此六字者即是欲修六妙
門故須用此爲前方便也端身者即跏趺坐
也是約戒者戒防身口故約端身定制亂心

故約正心慧能念念分別故約相續陽上陰
下者如天地也此是世俗所用右陽下正明
佛法表對之意右陽左陰如前記欲將等者
陰表定陽表散散即定障也故以陰上陽下
世俗旣有威儀者即左手壓右手爲世俗威
儀也此即下示所表龐犧即七支愆過也自
權而顯實者自從也先安右手居下如先施
權後以左手置上如後顯實此戒等者於十
人中唯約人明慧復須甄別分段中七人是
權一人是實變易中一權一實慧既不等戒

定自殊從一下釋修證也分三初正示經文
此一段經六門義足委論行相具在不定止
觀及次第禪門是數門者謂攝心在數不令
馳散名修數門成就息念者謂覺心任運從
一至十不加功力爾時應捨前數法修於隨
卷五
門一心依隨息之出入想心緣息知息出入
心住息緣故經云無分散意等也不澀不滑
等者謂修止時不念數隨凝靜其心故云不
澀不滑等也經如嬰兒等即喻修止不澀滑
之相也嬰兒者蒼頡篇男曰兒女曰嬰今言

嬰者通男女也釋名人之初生曰嬰兒者曾
前曰嬰接之嬰前而乳養之也下去是三門
者經文從於心端至去於鼻端是觀門還入
心根是還門令心明淨是淨門赤肉下別釋
觀門然經中談觀門義即通明禪也準禪門
所說有修有證此禪既無別次位還約四禪
而辯修證今此經文即是初禪覺支證相也
禪門明證相有三謂初證中證後證今經所
明如琉璃不青黃等則似中後二證欲委知
者請尋彼文初心行人欲修習者當依六門

次第先修數門即如經云安座徐數從一至十也數成修隨隨成修止止成方修觀也若約所宜隨修一門則無前後四大脈者對小得名十脈百脈名小脈趣四下大師口決云心如拘物頭華四片相合一片各有十紀脈共交絡故心端有四十脈也口決正示初心故止云四十不云四百四十也經云取一中脈者口決云直往趣臍號曰優陀那風優陀那者中也故號此脈爲中脈也又取等者即是中脈直下趣臍還從臍出至於頭十脈故

經云從大脈出至於舌下也口決云其息出從臍出入至臍滅今明出息至舌端故取上四十脈合四大脈爲十四也應舌至鼻者應宜作從字之誤也即釋經文從舌脈出乃至於鼻端還入心根直趣於臍猶如江海流注也口決云身中脈如百川通海是也肝屬木故氣青肺屬金故白脾屬土故黃腎屬水故黑心屬火故赤是略耳者以經不言不赤故諸氣來會鼻等者諸氣即五藏脈氣也至鼻時失其青等本色但如琉璃瑩徹非五色

法五

也息細八寸者此釋經文正長八寸也八寸
是出息之微細不麤大也正即端正不斜曲
也定將散者廣雅云將扶也釋名云將檠也
今以八寸之息扶持檠護其散亂也表八正
者八數等故經至於鼻端者此息從口而出
從鼻而入也經還入心根者以此息還從鼻
入至於心藏也此即還門不定止觀云修還
者既知觀從心生若隨於境此即不會本源
應當反觀觀心此云還入心根即當反觀觀
心義也經今心明淨者此即淨門不定止觀

云修淨者知色淨故不起妄想分別受想行
識亦復如是息妄想垢息分別垢息取我垢
是名修淨舉要言之若能心如本淨是名修
淨即今經令心明淨義也然六門皆有修證
合成十二故瑞應云遊止三四出生十二也

十科意者即大師於建業瓦官寺爲尚書令
毛喜略出此法以爲十科名不定止觀今題
爲六妙門者是十科者一歷別對諸禪二次
第相生三隨便宜四對治五相攝六通別七
旋轉八觀心九圓觀十證相今此經文所明

但是第二一科意耳若此下辨此經觀門也故言通者以通總而說未揅三乘今三下既未開顯須示三乘差別之相故須後別方顯前通經勇猛寶幢者破煩惱陣故曰勇猛貴極名寶超出曰幢經駛速也若無常等者謂餘經或先觀無常也此有三種者五門之相經不顯談佛意難量故作三釋五處止等者不定止觀云止爲妙門者行者因此止心故即便次第發五輪禪一地輪即未到地二水輪即種種諸禪定禪根發也三虛空輪即五

方便人覺因緣無性如虛空四金沙輪即見思解脫無著正慧如金沙也五金剛輪即第九無礙道能斷三界結使永盡證盡智無生智入涅槃也通名輪者借譬得名禪門云輪者轉也如世輪若轉離此至彼經文既云節節繫念繫念即是止門止門即出生五輪也故云即是其義今明念佛一門者然五門禪禪經數論兩出不同今師正用禪經故取念佛一門而不明界方便也以今經自云得念佛定故餘者下四門經論皆同慈心等者即

等取所治也謂念佛治睡障道數息治散亂等而毗曇等者正明彼論五門與今經不同也今經五門正可與禪經會同以俱有念佛故界方便破我見者彼論云著見行者以界方便愚夫不了宿業煩惱積聚五陰於緣計

法五

十二

我當於自身以界方便觀察種種性業相謂地等六界彼地界者爲水所潤而不相離彼水界者爲地界持故不流火界成熟故不淤壞風界動故而增長空界空故食得出入有識界故有所造作由衆緣故故知無我足數

息等爲五門者等取不淨因緣慈心則無念佛也乃是因緣等者謂毗曇中界方便破我祇是禪經因緣觀義耳以因緣有三種各破不同故一者三世因緣破斷常三世相續故不斷三世迭謝故不常二者二世因緣破我不斷三世迭謝故不常二者二世因緣破我謂現未二世具十二緣於父生愛於母生瞋名爲無明父遺體時謂是已有名之爲行從識支去至老死支與三世同三者一念破性如下記文是知此三並是著諸邪見不出生死故通名愚癡故因緣破癡已具破我義也

毗曇五門明界方便破我乃成煩長於破障道仍闕念佛是故今依禪經方爲具足乃與今經其義符合故云是故用念佛等無常等者前三如向疏釋無我即不著能觀寂滅即推求能觀至不可得若五下經云從頭至足

法五

十三

一一節間皆令繫念頭等是色繫念是定又五輪因止而發故屬定也合用定慧者停心五處是定五處觀察是慧又數息是定餘四是慧復次下明開合五門六妙既是開合之異故知云修五門禪者即六字義也又此五

六但是能治能不孤立對所得名所治者何所謂三障故東五六以成三障出隨止二門者數息已當數門即三妙門也息有三種者若準禪門明三種即數息隨息觀息今約觀門別有所對故以止門在數息方便中各隨義便止即不念數隨凝寂其心也以約數隨而修止故故今以止門在數息中不淨分別六貪各各修觀慈心分別九品一一與樂此二約觀照義便故對觀妙門因緣方便是還門者因緣破斷常等見還門即反觀心源四

句檢心至不可得即破斷常等見故知因緣即是還門念佛既通三身今以念佛身當淨門也以淨門不起妄想諸垢心無依倚即是見法身理也又合下以能對所結成三障也數息是報風等者禪門云等分之中覺觀亂法即是麤四陰故名爲報障慈心不淨因緣者謂慈心治瞋不淨治貪因緣治癡此三毒法五之法於沈審心中記數能治明利半昏半明者應教令隨隨息出入則心常依息若但數息即有扶昏之失若但觀息亦有扶亂之失不名善對治也三昏沈者應教觀息求其根原出無分散入無積聚不見定相心眼即開謂於修定時三毒之中亦無的緣或緣貪或

緣瞋或緣癡而所緣之事分明了了二半明半昏心中覺觀明則覺觀的緣思想不住昏則無記瞪曠無所覺了三一向沈昏心中覺觀謂雖心昏闇如睡眠中而切切攀緣覺觀不住即有三治者一明利者教令數息數息之法於沈審心中記數能治明利半昏半明者應教令隨隨息出入則心常依息若但數息即有扶昏之失若但觀息亦有扶亂之失不名善對治也三昏沈者應教觀息求其根原出無分散入無積聚不見定相心眼即開

破於昏沈恚有三種下文闕注云云三種者一非理瞋謂修定時瞋覺歎起無問是理非理他犯不犯二順理瞋謂外人實來惱觸三諍論瞋謂已所解爲是謂他所說爲非既他說不順己情即心生惱覺欲有内外者即此內外以成三種一外貪欲謂修定時貪欲心生男即緣女女即緣男取其色貌等二内外貪欲謂非但貪外男女復自緣已身形貌摩頭拭頸念念染著三遍一切處貪欲謂非但愛著內外正報而復於一切五塵依報起貪

也癡有斷常性者此亦三種一計斷常二計有無三計世性此三並是著諸邪見不出生死是故通名愚癡斷常者推尋三世若謂滅即墮斷中若謂不滅即墮常中有無者謂我及陰等諸法爲定有耶爲定無耶乃至非有非無耶世性者謂由有微塵故有寶法有實法故便有四大有四大故而有假名及諸世界業有沈浮惡境者惡業障道亦有三種一沈昏暗弊障謂於修定時昏沈暗睡無記瞪瞞無所別知障諸禪定二惡念思惟障謂雖

法五
十五

不沈昏而惡念心生或念欲法十惡四重五
逆毀禁還俗等事三境界逼迫障謂身或卒
痛覺有逼迫之事見諸外境或見無頭手足
等或復夢中見諸惡相治法亦各有三者瞋
病既有三種對治亦三一治非理瞋者應今

修衆生緣慈謂約親中怨各開三共成九品
觀之皆令得樂取他樂相能生愛念即破於
衆生中瞋惱怨害之心二治順理瞋者應教
修法緣慈謂觀五陰虛假不見衆生豈有是
非之事但緣諸受中法樂以與於他慈心愛

念不應加憎是非既泯瞋心自息三治一切
法中諍論故瞋者應教修無緣慈行此慈時
言語道斷心行處滅於一切法不憶不念若
無憶念因何諍訟而生瞋心大慈平等同與
本淨之樂治三種貪者九想治內背捨治內
外大不淨治一切處治三種癡者三世因緣
治斷常二世治計有無一念治世性治三種
業障者念應佛謂心緣三十二相等治沈昏
暗塞障念報佛謂心緣力無畏等治惡念思
惟障念法佛約心緣法性空寂治境界逼迫

障藥病相對成二十種具在禪門第四卷明
內方便中委說故云具如禪門皆注云云者
指在彼文也不用此等治者不用向所明十
五種事治也如幻如化者即下文十喻入實
際即下文推四大一一入於如實之際也此

法五

十六

即今經但用第一義般若正觀通能治十五
種病也摩訶衍云有三昧能治三毒即是今
經所明一空無相正觀第一義悉檀也正觀
能治三種貪者思益經云貪欲之人以淨觀
得脫不以不淨正觀能治三瞋者般若說昔

爲歌利王割截身體爾時無我相等則瞋恨
不生故知實相能治於瞋正觀能治三癡者
智慧破於無明其義可見涅槃云明時無暗
智慧時則無煩惱正觀能治三覺觀者正觀
心中言語道斷心行處滅淨名云何謂息攀
緣謂心無所得正觀治三業障者普賢觀云
端坐念實相是名第一識是知正觀如何竭
藥即能遍治眾病也故云以入實際遍治之
斯那聞下等者此屬第三明六根六字文義
鉤鎖故兩向科之經云時優波斯那聞是語

已身如水火等即簡聲聞觀無明行等即簡緣覺或入寂定等即簡菩薩故云簡三乘人六門也金是慧者釋身真金色也金能決斷慧能斷惑以五分有慧身故云身也三乘下約通三乘也俱有即空之慧故同入真理利根被接則見中道故第一義不無深淺第三根被接則見中道故第一義不無深淺第三審者分經爲五初斯那問二身子答三聞法悟道四身子白佛五述成功用經即從座起者禮云請益起請業起斯那備其儀故從座起此則二土之禮玄同也即有三種者謂順

法五十七
色違色平平色初一念時等者即是心王了其總相謂識創起但緣青等總相故云初一念時也以未與貪等相應故名獨頭輔行云直爾障理名獨頭無明一念轉等者即是心所了其別相謂次取境像即心想也次領納

前境即是受心次起貪等煩惱造作即是行心故云一念轉等輔行云與諸使合名相應無明若順下示相應相無記即癡也不令三種心起者雖對三色以數息故則貪瞋癡心不起毗曇論明三藏有門見空如成論即三

藏空門於四門中略舉二門此約聲聞乘也若觀下明一念十二因緣也大集云因眼見色而生愛心即是無明爲愛造業名行至心專念名識識共色行是名色六處生貪是六入因入求愛名觸貪著心者名受纏綿不捨名愛求是等法名取如是法生名有次第不斷名生次第斷故名死生死因緣衆苦所逼名惱乃至意緣法塵亦然此約緣覺也不明菩薩者略耳此六等者據法相應先身後意今經文先明意後明身故云不次第經諸願

倒想等者亦約意根也想即想數也其耳等五根皆有三種相應攝住例眼可知故疏不說今言下釋身根五根微細者對身即身根麤大故意根若領等者釋五根皆寄身根法塵也意根懸思五塵即是領納法塵也已虛有諸觸者非實對色等境但心思色等時則眼等已虛有色等諸觸也文剩備至二字不然則虛有下闕領受二字故言下牒經故知經舉五塵者是心意懸思乃屬法塵耳與細滑相應即是心思時虛受諸觸也故經即云

而此識賊乃至遍緣諸法也傷害真性名之爲賊攀緣不停故云如猿猴走遍緣諸法即是懸思五塵時身已虛受諸觸也故此一段經文但是明身根耳通別圓意者通了根塵即空別了假名圓了中道皆名攝住此則十種行人俱論攝住也前約事解即屬苦報人及修世間善法人如實故言無堅者體地本虛入如實際即無堅也通教下示觀法也通通別圓故示通義餘亦可了有堅應云無堅字之誤也又四下破四見示無堅義謂若依

三藏四門所見俱成堅執豈得無堅隣虛者極細之塵隣於虛空名隣虛塵毗曇析色不滅隣虛即有門也見空即是無見者成論析色隣虛亦滅即空門也乃至四句者兩亦如毘勒論雙非如迦旃延經深著等者謂析地至隣虛即地是有_{法五}即實實是堅義若謂地是無兩亦俱非是事實餘皆妄語此之邪執並是堅義故云深著不可捨等既離四過故求不可得即無堅性也然此地大本非四句無堅名字因情謂堅故四句寄堅破執水不

住四句者謂水爲有有即是住乃至謂水是非有非無亦即是住今不住有四句亦不住無四句中亦不住不可說中故言水性無住風無礙等者觀風爲有有是礙乃至謂風雙非皆是礙也故云豈無四句質礙今觀無四句故故云風性無礙不言火大者文略也應云火不從自生乃至不從無因生本無自性賴緣而有故云火性不實此明四大本虛即色陰入如實際也餘之四陰經文存略但例色陰而已故云受想行識等若欲推之應云

受無領納性不可得若謂受是有有是領納乃至謂受是非有非無亦是領納乃至識是了別亦復如是經云一一性相者即性相俱空四句推不可得是性空亦不住無四句是相空所以經文約五陰示者以一切衆生皆五陰現前故故以陰爲觀境經云皆悉入於如實之際者五陰俱空故云皆悉等如實之義應通四教同名實際而有空中之別經諸結賊者見思煩惱能結縛賊害於行人也若約三結釋義即疑身見戒取名三結也是身

出火者即經云身中出火也但有無漏火者
慧人但修無漏觀斷惑不修觀練等禪故無
神通不能化火焚身也備有事理火者用無
漏觀斷惑是理火修事禪發神通能化火焚
法五
身是事火子縛即煩惱因果縛即若依身以

能化火故燒果縛經收其舍利者新云設利
羅此云身骨而有全有碎碎者悉如芥粟今
斯那即碎身也經於上起塔者梵云塔婆新
云窣堵波此云廟或云方墳此義翻也見十
方佛是聲聞者即經云毛孔見佛也問小乘

不說有十方佛何故云見十方佛是聲聞耶
答小乘之中諸部不同亦有信十方佛者即
小乘人修第四禪邊際定力見十方佛等破
惡成支佛者即經云觀無明等十二因緣皆
悉不實名破惡也經舉十喻皆喻因緣即空
熱時炎即陽燄也野馬行者風動塵故於曠
野中猶如野馬行也乾闥婆城者靜苑法師
華嚴音義云乾闥婆城此云尋香城謂十寶
山間有音樂神名乾闥婆忉利諸天意須音
樂此神身有異相即知天意往彼娛樂因以

此事西域名樂人爲乾闥婆彼樂人多幻作城郭須更如故因即謂龍蜃所現城郭爲乾闥婆城也以如彼樂人所作故如幻者如幻師幻出象馬等如化者如得神通者種種化現住不退是菩薩者即經云或入寂定已去^{法五}經文也此雖約通而通別圓以有接故經童真即圓初住念不退也言服者結成意也者即向經云若有服者身如琉璃等今示此文是結成三乘六門之意也疏文從便先示經中三乘之文後方點出一段經文盡是結成

之意經具戒定等者即成五分法身也防非止惡名戒息慮靜緣名定觀達有無名慧累盡清淨不滯有無名解脫於一切境知見顯了名解脫知見此五作成身之因名分可軌則名法有體依聚三義名身用此五故名爲法身正在三藏義通四教經身出水火者即現十八變身上出水身下出火等也經發三種清淨三菩提心者三乘道心也經夢中等者夢即如夢三昧也三昧成時能見觀世音即相似分真位人也如大猛風等者三昧如

猛風惡行如重雲生於佛前即初住出聖胎也此約理釋若事解者即往淨土佛前蓮華化生也故經云蓮華化生爲父母三流通分疏文無釋今私分爲五初讚歎付囑二初長行二偈頌分二初七言偈付囑三初十二行付囑爲護正法文中所囑意在四王東南則囑其正主西北則囑其臣屬囑主則臣可知矣囑臣則主可知矣提頭賴吒者此翻持國謂護持國土安衆生故即東方天王也等者等取所領二部鬼神即乾闔婆及毗舍闍此

即舉主收臣也天子者金光明云雖在人中生爲人王以天護故稱天子也王肅云王者雖號稱帝而不得稱天帝而曰天子者乃天之子子之與父尊卑相去遠矣法臣者有法度之臣故曰法臣佛勑令擁護是經如法臣

法五
護於天子也我勑海龍下四行是付西北二方之臣屬也西方毗留博叉此云雜語或云醜眼主領二部龍及富單那也龍是臣中之勝者故偏囑之伊羅鉢者亦云伊羅跋羅伊羅樹名也此名臭氣跋羅此云極謂此龍往

昔由損此極臭樹葉故致頭上生此臭樹因即爲名閻婆此云雙羅刹此云可畏即北方天王之臣屬也北方毗沙門此云普聞或云多聞主領二部謂夜叉羅刹又云毒龍等者再囑西方臣屬也龍有四毒故曰毒龍謂聲視氣觸也有出聲方害人者乃至觸人方害者毗留勒迦或云毗留勒叉此云增長謂能令自他善根增長故即南方天王也主領二部謂弓繁茶及閉黎多此亦舉主牧臣也難陀跋難陀者難陀名歡喜跋名善兄弟常護

摩竭提雨澤以時國無飢年覩沙王爲一會百姓聞皆歡喜從此得名慈恩云第一名喜次名賢喜此二兄弟善應人心風不鳴條雨不破塊初能令人喜後性復賢令喜故以爲名婆伽羅從海受名慈恩云即鹹海之龍也優波陀亦優鉢羅亦毘鉢羅此云黛色蓮華龍依池得名慈恩云紅蓮華居池爲名帝釋者梵云釋迦提婆因達羅釋迦姓也此翻爲能提婆天也因達羅帝也正云能天帝釋提桓因云天帝釋俱訛倒也此在妙高山頂而

法五

十一

住三十三天之帝王諸天即三十二也孝子者孝者畜也事親之道宜常畜在心以在心故能順顏色正導者若眼自開明則不須導引故云須眼又據眼未開者須假正人導之則免墮重險也此段經文凡有五譬皆譬持經之人謂一帝釋二父母三財寶四眼五正導但取擁護心專爲義二我勑下明達順損益分二初明違教致損鬼神者尸子云天神曰靈地神曰祇人神曰鬼惡人惡口者者三業不善謂之惡人而偏舉口業者以口能毀

謗故起不善是修因白癩是花報墮獄是果報二是故下明順教獲益一初破惡益地獄餓鬼其苦重故故偏舉之經云無八難則兼於餘趣也此則破六道三障之惡也二後生下生善益分二初正明生善分二初自行善二普施下化他善一切即十界大安樂即三德涅槃也約五即明普施義修十地者即圓十住地從所依得名又別地即圓住故二我從下引己爲證分二初證自行二末與下證化他三界即二種三界也二若有下總明人

法功能初二句是人誦持此呪即法離諸惡去五句三字明破惡生善功能初離諸惡等破惡也蓮華化生等生善也胎經云蓮華化生者非胎卵濕化之化生也非化而言化耳實不如四生中之化生也心淨即三德分顯

未五
無塵垢即三惑分除二五言偈讚歎二初通歎道齊如日月者破衆生煩惱暗如日月之照晝夜也又日喻實智月喻權智流出等者相總而好別相若無好則不圓滿輪王釋梵亦有相以無好故相不微妙從總出別故云

廿四
今經二初歎能說教主一切佛即十方三世以諸佛皆讚觀音大悲故二讚歎下歎所說人法顯諸佛皆說此經也二爾時下說呪護持三初敘意二正說呪此呪歷尋古今多本詞句咸同故不錄入良由行人不誦致免改

易三明功用三舍利下傳授所因二初身子
問三初歎四呪功能如此神呪者通指四番
呪二世尊下正請所因三使未下未來有益
二釋迦下答二初正答所因二初悟道因由
二初通示所因謂通於無量佛所聞說此呪
法五
也二又念下別示所因別於一佛所聞也文
分爲四初值名號二彼佛下聞佛言教三我
即下依教修行四霍然下行成證理霍然者
應法師云倏忽急疾之貌也無生忍即圓初
住首楞嚴者大論十八翻健相大經云首楞

者一切事竟嚴名堅固一切畢竟而得堅固
名首楞嚴也二若善下勸持獲益受持讀誦
書寫解說者信力故受念力故持看文爲讀
不忘爲誦聖人經書難解故須解釋宣傳爲
說受持是意業讀誦解說是口業書寫是身
業二佛說下衆聞悟道五百即月蓋等四舍
利下未來獲益二初身子白佛二佛告下如
來印可再言如是者深可其言也五說此下
衆喜會散

請觀音經疏闡義鈔卷第四

永樂北藏

請觀音經疏闡義鈔

第一六六冊

音釋

韻切胡結牛例剗切胡父沸鍊胡開六兩也蓏郎果
木曰果在籬郎佐疏吏也蓏切在
地曰蓏在籬佐疏吏也蓏郎果
應切也籬郎佐疏吏也籬郎果
時也籬郎佐疏吏也籬郎果
戰也籬郎佐疏吏也籬郎果
羅也此云云不曉也籬郎佐疏吏也籬郎果
限明母亘也籬郎佐疏吏也籬郎果
量也此云云不曉也籬郎佐疏吏也籬郎果
切也籬郎佐疏吏也籬郎果
窄也籬郎佐疏吏也籬郎果
睹也籬郎佐疏吏也籬郎果
窄蘇骨也籬郎佐疏吏也籬郎果
五骨也籬郎佐疏吏也籬郎果
切也籬郎佐疏吏也籬郎果
逾繙那語也籬郎佐疏吏也籬郎果